

妙法蓮華經文句卷第五上

寔九

隋天台智者大師說

門人灌頂記

從我始坐道場下第二十七行半頌施方便  
化就此為二初有六行半明念用大乘擬不  
得次尋念下第二十一行明念同諸佛用三  
乘化稱宜可得就初念用大化又為三初一  
行半明用大擬宜次眾生下第二三行明象  
生無機次我即下第三二行明念息大化也  
始坐道場者至理無時假時化物為化之初

故言始也事釋者初在此處修治得道故言  
道場坐此樹下得三菩提故名道樹感樹恩  
故觀察念地德故經行道成賽澤之時欲以  
大法擬宜眾生也觀心釋者樹即十二因緣  
之大樹也深觀緣起自成菩提欲以無漏法  
林樹蔭益眾生故言觀樹經行者大乘三十  
七品是行道法自以道品履一切地得成佛  
道欲以此法化度眾生是故起行樹地無有  
分別豈須報恩未曾有經云祇以通化傳法  
名報恩耳過去因果經云佛成道初一七日

思惟我法妙無能受者二七日思衆生上中  
下根三七日思惟誰應先聞法即至波羅奈  
爲五人說四諦陳如得法眼淨頗鞞拔提十  
力迦葉摩訶男拘利未得道佛重說四諦四  
人得法眼淨佛又說五陰無常苦空非我五  
人得阿羅漢佛爲佛寶四諦爲法寶五人及  
佛是六阿羅漢即是僧寶小雲疏云初三七  
日時已是說法華下文宿王華智佛在七寶  
菩提樹下說法華經當知今佛在菩提樹亦  
說法華而鈍根衆生不堪允同諸佛開三教

化後於玉城說一乘耳若推智者意是則先  
在菩提樹下說於佛慧後在餘處說佛慧例  
如今佛先說華嚴後說法華故文云始見我  
身聞我所說入如來慧除先修習學小乘者  
而今亦令入如來慧聖九與此義同也五比丘者  
諸女聽仙人說法惡生王瞋割兩臂耳鼻等  
血變爲乳惡生王者拘鄰是仙人者佛是佛  
誓令得甘露今初聞法音也問何故初爲五  
人轉法輪答人先見諦故人是現見故人爲  
證故佛所行事業與人同故諸天從人中得

善利故入中有四衆故輪王出世聲至他化自在憍陳如得道聲至梵天佛得道聲至首陀會何故爾答善業名譽業稱讚父母師長業有上中下故爾也若使有頂有耳識者佛聲亦至彼輪王行十善善生欲天欲天喜我眷屬增多故陳如離欲故徹梵佛最勝至尼吒云云若依大乘佛得道聲徧至百億尼吒又徧十方無量無邊世界尼吒云云初轉法輪處菩提樹處初初利下處大神變處此四處諸佛皆定餘處不定又除轉法輪一處其三處

決定三七日者舊云思理教等又云勸誡等瑤師云事之至深至聖猶思而後行一七思佛智微妙二七思衆生根性不同三七思法藥萬品即舉偈證之我所得智慧微妙最第一衆生諸根鈍云何而可度三今明佛在法身之地寂而常照恒以佛眼洞覽無遺豈始至道場淹留三七方思此事言三七者明有所表也表佛初欲三周說法故假言三七耳初七思法說次七思譬說後七思因緣說皆無機不得是故息大施小也此徧就圓教大乘

爲釋耳若通途約大乘釋者初七思惟欲說  
圓教大乘次七思惟欲說別教後七思惟欲  
說通教大乘皆無機不得是故息大說三藏  
三乘爲方便之化也觀心釋者初欲觀中道  
中道妙難觀不得次欲觀即假即假觀分別  
智難生不得後欲觀即空即空巧度又不待  
方觀方便析法小觀也從衆生諸根鈍下第  
二三行明無機又爲三初半行明障重次如  
斯下第二半行明不堪聞爾時梵王者下第  
三有二行明諸梵雖請說大佛知無機所以

不說我即自思惟下第二有二行明念欲息  
化又二初一行半明無機強證聞則有損後  
半行正明息化從尋念過去佛下第二有十  
一行頌上於一佛乘方便說三也就此爲二  
初十行正明化得後一行釋疑就前十行有  
四初一行明三乘擬宜次作是思下第二六  
行半明有機次思惟是下第三一行半明施  
化次是名下第四一行明受行尋念者念彼  
雖無大機不容永捨要以方便而誘濟之非  
都不知開三欲引同諸佛故云尋念也作是

思惟下第二六行半明有小機此又為二初  
四行半明諸佛歎後二行明釋迦酬順上欲  
大化於彼無機故諸佛不歎今欲說小曲會  
根緣則始終得度所以佛歎也就初佛歎為  
五初三句釋迦自叙諸佛現佛現者由念佛  
方便力故現現由擬法會機二義故佛現善  
哉下第二一行一句明諸佛正歎釋迦能隱  
實設權故云善哉為一施三引入佛慧即是  
第一導師得是無上法者即是得實智微妙  
第一也而用方便力者隨諸一切佛隱實用

權也我等亦皆得下第三一行明諸佛亦隱  
實用權如文從少智樂小法下第四一行雙  
釋二義為衆生少智不堪聞大所以隱實而  
復樂小所以施權雖復說三下第五半行雙  
結二義雖復說三終為顯實也舍利弗當知  
下第二有二行明釋迦酬順既聞諸佛歎對  
曰南無南無此云敬從又二初一行發言酬  
順後一行念順物機從思惟是事下第三一  
行半正明施教也諸法寂滅相不可以言宣  
下即是前說中道無性佛種之理此理非數

又不可說今以方便作三乘說又非生非滅  
而以方便作生滅說又偏具之理亦非示說  
以方便故作四門說初爲五人說無常有門  
也是名轉法輪下第四一行明反行悟入也  
轉佛心中化他之法度入他心名轉法輪陳  
如初得見諦即斷見惑分證滅諦亦是分得  
有餘涅槃涅槃之音起自於此由此得成無  
學便有羅漢之名能說三乘法者名佛所說  
三乘即法見諦羅漢等名僧三寶於是現世  
間從久遠劫來下第二一行是釋疑疑師云

佛初未能鑒機尋念諸佛始知根性即釋云  
非我不知用於方便特欲引同故念諸佛非  
始念方知從久遠劫來見其樂小已爲讚示  
令盡衆苦所以聞小即得解脫也疑弟子云  
云何衆生一世暫聞即證羅漢即釋云從久  
遠劫來爲其讚示稱於本習故速得道舊云  
此偈懸指壽量義今明論秘密意或當如此  
明顯露意是則不然何者將明壽量彌勒尚  
自不知云何此中一偈懸指今以釋疑消文  
從我見佛子等下第三有六行頌上顯實文

具四一初我見佛子下二行頌人一三乘行人皆是佛子上文兼有其意也我即作是念下第二一行頌理一為說佛慧即是上一切種智佛知見也舍利弗當知下第三二行頌教一但說無上道即教一也菩薩聞是法下

第四一行頌行一悉亦當作佛故是行一也更就此文為四意初二行明大乘機發亦云索果次兩行一句明佛歡喜眾生得大乘益故次三句正明顯實次一行受行悟入也明由機發故索果索果由於機發此應有四句

自有障除機未發如諸羅漢在三藏時以樂小故濁障雖除大根鈍故妙機未發自有大機發障未除如法華中諸凡夫人等雖未斷結以大根利故機發自有障即除機即發如說無量義時證二乘果即於此座大機即發自有障未除大機未發即五千等是也志求佛道者即是索大非求小果也索有三意一大機有感果之義機中論索二情中密求為得為不得即此意三發言索即是殷勤三請也昔教之中已有二求但未發言至於今日

具此三索問昔出宅索三是機情索者文云如先所許此乃求三何關求一答出外不見必有異途將昔許三以求異意耳亦得是索一也咸以恭敬心皆來至我所者一云恥小慕大大機感佛故云至佛所今明非但機至佛所亦乃身到如無量義中四眾圍繞合掌敬心欲聞具足道也曾從諸佛聞方便所說法者此中初味調伏受行三藏六度通別等三教方便由此調熟故使障除機發而求大也從我即作是念下二行一句明障除佛喜

佛為佛慈故出昔障重無礙不得即說佛慧中間雖障除又未得說今機發正是說時昔眾生根鈍智小恐其謗法隨惡故未是說時今根利志大聞必信解故佛歡喜無畏者不畏執小謗大起罪隨惡故言無畏於菩薩中下三句正顯實也從九五乘是曲而非直通別偏七傍而非正今皆捨彼偏曲但說正直一道也菩薩聞是法下一行明受行悟入六度通二菩薩初聞略說動舊執致新疑今悉已除非獨菩薩二乘亦爾而云聲聞皆當作佛者昔

教不說二乘作佛今行與授記授記豈獨二  
乘除疑豈獨菩薩互存則兩備問菩薩何疑  
答三藏說三僧祇未斷惑一斷即入真通教  
說菩薩斷正留習習盡即成佛初聞略說悉  
云方便昔真昔成竟知安在又三乘同學一  
道何意有別今聞法華掃蕩諸疑無復遺芥  
從如三世諸佛下第四五行半頌上歎法希  
有非正爲下不虛譬本就此爲二初一行頌  
上如是妙法妙法者權實也如三世者引同  
諸佛用權權是引物之儀式也說無分別法

引同諸佛顯實實則言語道斷豈存儀式又  
權實本無分別爲鈍根小智分別權實今還  
悟入一三不二即知佛說三一無分別也諸  
佛皆爾何獨我耶諸佛興出世下四行半頌  
上時乃說之上亦舉曇華頌中還說諸佛興  
出世兩句久久懸遠時有佛出此舉人難正  
使出於世兩句此舉法難如今佛出世四十  
餘年始顯真實云無量無數劫兩句此舉聞  
法難如五千之流梵音盈耳越席而去聞豈  
不難乎能聽是法者兩句舉信受者難普衆

唯身子前達中下雖聽猶未能了舉曇華譬  
上四難但合聞者難餘例可解從汝等勿有  
疑下第五二行半頌上不虛又二初一行半  
勿於可信人生疑次汝等舍利下一行勿於  
可信法起疑法王者夫為八王言則不二佛  
為法王豈容虛說夫方便可是權假真實寧  
應是妄聞法王說法勿生疑也舊從汝等舍  
利弗下七行不頌敦信但是釋迦章中勸信  
弘經之意耳其文為兩初五行半今弘經使  
其行因次一行半略為受記初一行今其慕

果行因必須弘經四十餘年蘊在佛心他無  
知者各為秘一乘直道總攝萬途故言要也  
以五濁惡世下一行釋秘要明障重之人終  
不能解故使如來秘不妄宣當來世下二行  
明弘經體初一行明不善人勿為說後明善  
人當為說舍利弗去一行半雙結二義初行  
結秘要明此法如是先以萬億方便然後乃  
示真實後半行結弘經體其不習學不能曉  
了此正結不善者勿為說也兼對習學者則  
能曉了此乃可為說也汝等既已知下一行

半略爲授記上明三句論其有解中一句明其無惑下半偈明其得記既有解無惑正應歡喜作佛此中受記開下身子等得記作本此中弘經開下命身子流通作本也舊意如此今明從五濁下第六六行頌上揀衆敦信上幸有此文近而不頌耶又二初三行頌揀衆次三行頌敦信五濁者一行頌上揀非佛弟子何者若樂諸欲是行魔業故須揀之上文著涅槃尚非佛弟子此文著生死那是佛弟子互揀非耳終不求佛道者頌上揀增上

第九

九

慢上慢者未得上法謂得上法是故其人不求佛道也當來世惡人一行頌上如來滅後解義者是人難得也有慚愧清淨一行頌上若遇餘佛便得決了次三行頌上敦信若不信此法無有是處初一行半敦信於權吹一行半敦信於實實種無疑自知作佛云

釋譬喻品

先總釋譬者比況也喻者曉訓也託此比彼寄淺訓深前廣明五佛長行偈頌上根利智圓聞獲悟中下之流抱迷未遣大悲不已巧

智無邊更動樹訓風舉扇喻月使其悟解故  
言譬喻別釋者以世法比出世法因於曾有  
聞未曾有踊躍歡喜如經世間子父譬出世  
師弟又以世生法比出世生法使蒙佛音教  
不失大乘如經父知諸子先心各有所好珍  
玩之具又以世滅比出世滅雖得無漏聞亦  
除憂惱如經我為其父應拔其苦難令免燒  
煮又以世不生不滅比出世不生不滅令其  
安住實智中我定當作佛如經乘是寶乘直  
至道場當知佛以一音說於譬喻巧令中下

得四悉檀益故言譬喻品也約教解者佛意  
本讚佛乘為物不堪尋念先佛大悲方便趣  
於鹿苑稱讚三車二乘以下中自濟恩不及  
人菩薩駕牛運他出火故名摩訶薩此三藏  
教中譬喻也又三人同畏燒煮聲聞如鹿第九首  
去不迴緣覺如鹿母並馳並顧菩薩如大象  
身扞刀箭全群而出涅槃云兔馬此通教中  
譬喻也又三乘發心近緣理淺智慧弱斷通  
惑不能盡邊到底非波羅蜜菩薩發心久遠  
理深智彊斷別惑窮源盡性大品云二乘如

螢火菩薩如日光此別教中譬喻也又始見  
我身聞我所說即皆信受入如來慧如斯之  
人易可化度不令如來生於疲苦如華嚴中  
即事而真不須譬喻為未入者四十餘年更  
以異方便助顯第一義今日王城決定說大  
乘普令一切開示悟入佛之智慧不令一人  
獨得滅度如今如始如始如今無二無異上  
根利智聞即能解不令如來生於疲苦亦不  
須譬喻祇為中下動執生疑踟躕歧道故須  
今日大車譬喻而得利益是名圓教中譬喻

也本迹觀心例可解不復記云法說有五段  
經文其一始竟四猶未了此品應在諸天說  
偈之後火宅譬喻之前出經者調卷置領解  
之初耳又人云發起中根置第二卷初如六  
瑞問答為法說作序領解得記為譬說作序  
此人情耳置法說之後中根可不悟耶此領  
解段領其所聞述其所解長行領與解合說  
偈中領與解各陳故言領解段也文有二一  
經家叙二身子自陳叙為二謂內解外儀內  
解在心名喜喜動於形名踊躍從妙入聞妙

法得妙解若值一幸尚復欣抃况三喜具足  
寧不踴躍文云今從世尊聞此法音心懷踴  
躍内外和合致此歡喜即世界釋也又改小  
學大棄貧事草庵受富豪家業文云今日乃  
知真是佛子是故歡喜此為人釋也又憂悔  
雙遣疑難並除内外妨障廓然大朗文云我  
已得漏盡聞亦除憂惱是故歡喜此對治釋  
也又佛子所應得者皆已得之文云安住實  
智中我定當作佛此第一義釋也約教者夫  
歡喜喜於入位而阿羅漢出三界籠樊破四

住子果對害不戚逢利不欣今言歡喜決非  
世間喜也若苦忍明發若究竟無學先已得  
之今不應重喜若三人同以無言說道體析  
雖異證空一致一致之喜久已得之亦不重  
喜若二空觀為方便道假觀蕩二乘之隘陋  
空觀蕩凡夫之喧湫過二邊惡得大歡喜依  
圓悟初發心住名歡喜住初行亦名歡喜行  
初地亦名歡喜地身子既是上根利智必是  
超入之歡喜設不超入亦名歡喜此皆約教  
釋也本迹釋者身子久成佛號金龍陀迹助

釋迦為右面智慧弟子始從外道拔邪歸正  
示乳味歡喜利益凡夫次示酪味歡喜利益  
賢聖次示生酥熟酥歡喜利益菩薩今作醍  
醐入佛知見歡喜利益學佛道者如此等歡  
喜皆迹所為也觀心解不復記云叙外儀者  
即起合掌名身領解昔權實為二如掌不合十二  
今解權即實如二掌合向佛者昔權非佛因  
實非佛果今解權即實成大圓因因必趣果  
故言合掌向佛瞻仰尊顏者表其解實實即  
佛境非方便法瞻仰尊顏無餘思念表開佛

知見意解於實亦即解權身領於權亦解於  
實互舉一邊白佛下口領解也即是身子自  
陳文為二初長行二偈頌初文為三一標三  
喜章二釋三結成今從世尊標我身見佛身  
故名身喜聞此法音依於佛口聞而歡喜故  
言口喜得未曾有是我意解佛意故名意喜  
是為標章也次所以者何下第二釋者提昔  
之失顯今之得從所以者何訖無量知見明  
昔不見佛為失昔佛為菩薩授記我不豫斯  
事見佛義遠既不見佛故無身喜聞如是法

者若日照高山時密有聞義顯如聾如啞不得道聞如是法也祇是方等教中聞大乘實慧與今不殊故言聞如是法也受記者亦是方等中與菩薩記二乘不豫斯事甚自感傷思益淨名中聞褒大折小內疑而外鄙名爲感傷失一切知見者失佛眼之見失佛智之知也從世尊訖非世尊也明昔不聞法失良以身處山林心執小道則不聞法故無口喜我嘗獨處者思過之所也同入法性者正出其過執所入之一理疑於三教之能門一理

既同而我失知見三教既異而菩薩受別受別則如來有偏所以成過今述此失故言悔過是我等咎者由我迷權何關理教由我感實何關佛偏追述昔非仰謝如來是爲引過自歸也從所以者何訖每自剋責明意無解之失良以不待說所因則無實解又不識方便故無權解解無故故無意喜昔失既彰今得自顯不待說所因者自責不解實也不解方便者自責不解權也所因二義一不受待對於前二不停待於後初照高山明三諦之

慧是得佛因以此待對於我而我受失之於前諸佛法久後要當說真實我不停待於此兩極間忽忽取小不解實權如文而今從佛下結成三喜先結後成從佛是結身喜也聞法結口喜也斷諸疑悔是結意喜乃知真

是佛子近佛義成也從佛口生結口成也從法化生是結意成如此消文文盡釋理彰也更用四悉檀消文今從世尊下是世界歡喜從所以者何提昔失顯今得是為人喜從世尊我從昔來對治喜也從今日乃知下是

第一義喜也更約喜心明四悉心喜動悅常未曾有喜動覺觀復動手形<sub>云</sub>偈有二十五行半為三初一行頌標三喜舉我聞兼得佛也從昔來下第二十二行頌釋三喜又為三今初二行半頌見佛喜長行明失知見頌中明不失大乘上論失論遠頌論近論得互現耳我處於山谷下第二十一行頌上不聞法又為二初九行頌上身遠故不聞次我本著邪見下第二兩行頌上入法性故不聞邪見是凡人著入法性是二乘著俱不聞法我

嘗於日夜者生死為夜涅槃為日為生死中有涅槃為生死外有耶若得悟時二疑雙遣又生死涅槃俱為夜此疑得除名為日日出時二疑雙遣又世人二種一草創學大二習小入大補其事相直入者劣例如從阿毗曇中入者勝於菩薩亦應爾於華嚴中入者化道應弱五味洩汰入者勝從而今乃自覺下第三有九行半頌上心得妙解喜上明不待所因不解方便頌中明得所因又解方便聞當作佛是所以因聞五佛道同解魔非魔是解方

便互顯一邊五佛章即是領文也從聞佛柔輒音下第三二行半頌上結成如文爾時佛告舍利弗吾今下是第三述成段上身子自陳得悟今如來述解非虛文有三一昔曾教大二中忘取小三還為說大所以引昔曾教述其見佛之緣宜九若中忘取小述其憂悔聞法之緣還為說大述其悟解不虛述成上三意也十住毗婆沙云身無上謂相好受持無上謂自利利他具足無上謂命見戒智慧無上謂四無礙不思議無上謂六波羅蜜解脫無

上能壞二障行無上謂聖行梵行又身無上  
名大丈夫受持無上名大慈悲具足無上名  
到彼岸智無上名一切智不思議無上名阿  
羅訶解脫無上名大涅槃行無上名三藐三  
佛陀菩薩瓔珞十三云道當清淨穢濁非道  
道當一心多想非道道當知足多欲非道道  
當恭敬憍慢非道道當檢意放逸非道道當  
顯曜自隱非道道當連屬無行非道道當覺  
悟愚惑非道道當教化矜恪非道道近善友  
習惡非道如是等種種明無上道今經以圓

通爲無上道若偏若次皆他經所論長夜隨  
我受學者昔雖大化未破無明惑闇心中隨  
佛受學了因雖遠猶尚不滅況今真悟寧虛  
故舉曾教述見佛不謬也我以方便生我法  
中者此義兩牽若昔以大化今生大解此屬  
初意若今免惡道權以小引此是第二意從  
我昔教汝志願佛道汝今悉忘自有中途廢  
大習小名中途悉忘若而今便自謂已得滅  
度即是而今悉忘由汝忘大願即習小致有  
憂悔而得聞法不虛也我今還欲令汝憶念

本願即是述其得解不虛先施權教成其中  
途小善後顯真實遂其本願大心也從汝於  
未來下是大段第四授記段前自陳佛印竟  
是故與記若得大解自知得佛何俟須記記  
有四意一昔未記二乘而今須記二中下未  
悟以記勉勵之定九三令聞者結緣十四滿其本願  
是故記也有長行偈頌長行為十一時節二  
行因三得果釋十號甚多且記一種無虛妄  
名如來良福田名應供知法界名正徧知具  
三明名明行足不還來名善逝知衆生國土

名世間解無與等名無上士調他心名丈夫  
為衆生眼名天人師知三聚名為佛壞波旬  
名婆伽婆四國土五說法六劫名七衆數八  
壽量九補處十法住久近悉如文大論四十  
八云舍利弗正法三十二小劫者三灾飢病  
刀滅衆生者名小劫又直是時節名小劫如  
說法華經六十小劫亦是時節數耳非三灾  
滅外物為小劫也偈有十一行半為二初十  
行頌上九意略不頌補處長有供養舍利後  
一行半結歎初一行超頌得果次供養下第

二一行追頌行因次過無量下第三半行超  
頌劫名次世界名下第四一行半頌國淨次  
彼國下第五一行半頌菩薩眾數次如是等  
下第六半行頌說法次佛為王子下第七二  
行頌壽量次佛滅度之下第八一行半頌法  
住久近次舍利廣下第九半行供養舍利後  
華光佛下第二一行半結歎宜應自欣慶者  
成初入歡喜位之解也初住能百佛世界作  
佛行地倍是第五四眾領解有長行偈頌初  
經家叙眾喜次陳供養作是言下正領解初

領開權今乃復轉下領顯實也偈有六行半  
為二初二行頌上開權顯實後四行半自述  
得解隨喜迴向也我等亦如是者如身子之  
領解如身子被述成如身子之得記也問迦  
葉善吉諸大聲聞尚未得解四眾何人而先  
獲悟答四眾天人亦具三品上根同身子中  
下可知又解身子迦葉並是權行中下未開  
故迦葉滿願示同不解淨名云眾生未愈善  
薩亦未愈云從爾時舍利弗白佛下第二  
大段為中根譬說文有四品此一品正是譬

喻開三顯一信解明中根得解藥草如來述  
 成授記與決此四番皆約譬說下四段皆約  
 因緣陳如明繫珠緣而領解阿難引空王緣  
 而獲記云又例法說應有中根四眾歡喜而  
 今無者一謂經家存略二例前後可知後文

在法師品中云譬說文為二一請二答請為  
 三一自述無疑二述同輩有感三普為四眾  
 自述如文同輩是同行懷舊故須為請四眾  
 是化境今新運大悲則普為請佛常教化下  
 執昔三教也而今於世尊前下執昔一理也

昔說三是究竟今又說一為真實矛盾致迷  
 故言皆墮疑惑有人云身子新舊兩疑千二  
 百止有新疑今謂上根疑少中下疑多云何  
 倒解善哉世尊下為四眾普請也因緣者前  
 三後一之因緣也爾時佛告舍利下第二佛

答文為三一發起二譬喻三勸信發起為二  
 一抑二引抑令憤勇引令速進我先不言下  
 指上明權皆為菩提指上顯實皆為化菩薩  
 者若權若實皆入佛道無住涅槃上已明言  
 云何執教迷闇不解如此責謂是抑文也然

舍利弗今當下是引接安慰前片既切恐鄙  
懟自沈今許其譬喻更明此義若能解者猶  
稱智也二譬喻說長行偈頌長行開譬合譬  
開譬不同已如上說今為二一總二別總譬  
譬釋迦章中今我亦如是兩行偈略頌開權  
顯實也別譬譬釋迦章中我以佛眼觀見四  
十一行半偈廣頌開權顯實六意也總譬有  
六一長者二舍宅三一門四五百人五火起  
六三十子長者譬於我我即釋迦一化之主  
也火宅譬上處所安隱對上三界不安隱也

一門譬上宣示佛道門也五百人譬上眾生  
也火起譬上對不安隱法五濁八苦也三十  
子譬上知眾生性欲三乘行人也長者譬為  
三一名行二位號三德業名如賓行如主行  
有親疎名有近遠故舉處所以顯名行也封  
疆為國最遠宰治為邑居中聚落是鄰閭最  
近長者名行徧此三處近不見其細陋遠但  
挹其高風口無擇言身無擇行意無擇法名  
行相稱真實大人內合如來三業隨智慧行  
稱機施化名稱普聞德周法界也舊以十方

虛空慈悲所被處名國三千為邑一四天下  
為聚落又大千為國中千為邑小千為聚落  
今皆不用大論六十云柔順忍為聚落無生  
忍三菩提為城因果共為譬今經直用果德  
為譬實報土為國有餘土為邑同居土為聚  
落從本垂迹攝迹反本名行相稱無賓主之  
異彪炳洋溢徧三土也二標位號為三一  
世長者二出世長者三觀心長者世備十德一  
姓貴二位高三大富四威猛五智深六年著  
七行淨八禮備九上歎十下歸姓則三皇五

帝之裔左貂右挿之家位則輔弼丞相鹽梅  
阿衡富則銅陵金谷豐饒侈靡威則嚴霜降  
重不肅而成智則芻如武庫權奇超拔年則  
蒼蒼稜稜物儀所伏行則白珪無點所行如  
言禮則節度率序世所式瞻上則一人所敬  
下則四海所歸十德具焉名大長者出世長  
者佛從三世具如實際中生功成道著十號  
無極法財萬德悉皆具滿十力雄猛降魔制  
外一心三智無不通達早成正覺久遠若斯  
三業隨智運動無失具佛威儀心大如海十

萬種覺所共稱譽七種方便而來依止是名  
出世佛大長者三觀心者觀心之智從實相  
出生在佛家種性真正三惑不起雖未發真  
是著如來衣稱寂滅忍三諦舍藏一切功德  
正觀之慧降伏愛見中道雙照權實並明久  
積善根能修此觀此觀出於七方便上此觀  
觀心性名上定則三業無過歷緣對境威儀  
無失能如此觀是深信解相諸佛皆歡喜歡  
美持法者天龍八部恭敬供養下文云佛子  
住是地即是佛受用經行及坐卧既稱此人

為佛豈不名觀心長者今以十德帖經義足  
而闕一文國邑聚落有大長者三處稱譽為  
大豈非姓貴長者豈非位高衰邁豈非耆老  
財富無量豈非豐足多有田宅即分略周瞻  
豈非智深多有僮僕豈非勢大其家廣大豈  
非德行師之唯有一門豈非禮節訓人一路  
多諸人衆即下人所歸但闕上人所敬一文  
今以大字兼之大人所知故稱大也從其年  
衰邁下三歎德業德有內外內則智略外則  
資財年高博達今古譬佛智德衰邁根志純

孰譬佛斷德財富譬外德無量總譬萬德也  
田宅別譬也田能養命譬禪定資般若宅可  
棲身譬實境為智所託略則十八空門廣則  
無量空門若論福德無行而不修若論智慧  
無境而不照故云多有田宅也九九僮僕者給侍  
使人譬方便知見皆已具足和光六道曲順  
萬機即實智之僮僕也二其家廣大者家宅  
譬上安隱對不安隱不安隱譬三界也眾生  
穴穴皆宅三界如來應化統而家之故言廣  
大也三唯有一門者譬上種種法門宣示於

佛道道場觀云實相理不異慧亦宜一出無  
異路故言一門光宅雲曰三界雖曠九十雖  
多論於出要唯是佛教故言一門今明若單  
理為門理無通塞何門之謂單教為門得經  
者衆何意不出今取理為教所詮文云以佛  
教門出三界苦得涅槃證門又二宅門車門  
宅者生死也門者出要路也此方便教之詮  
也車者大乘法也門者圓教之詮也若宅門  
是車門初三車救子亦應即是等賜大車若  
所出門非所入門驗車宅異也四五百人者

譬上衆生即五道也五堂閣下譬上安隱對不安隱法五濁也先出所燒之宅相譬六道果報次明能燒之火譬八苦五濁堂譬欲界閣譬色無色界牆壁譬四大頽落譬減損傾危譬遷變柱根譬命梁棟譬意識腐敗譬危殆不久欲令易解作觀釋之堂譬身之下分閣譬頭等上分牆壁譬皮肉頽落譬老朽柱根譬兩足腐敗譬無常梁棟譬脊骨傾危譬大期周障屈曲譬大小腸又云譬心云周币下明能燒之火八苦徧在四大四生故言周

币並皆無常故云俱時欬然譬本無今有本無此苦無明故有六長者諸子下三十子譬上知衆生性欲曾習佛法天性相關則子義性欲有異若十是善薩子二十三十是二乘子此機俱得出宅故名爲子無此機是五百人或者支佛出沒不同或小乘攝或中乘攝皆言十者悉有十智之性故云內有智性但無如實智性耳上三偈先頌實後頌權今總譬中先實後權云云

妙法蓮華經文句卷第五上

音釋

輔	薄	根	徒	切	洗	賽	先	代	切
也	容	也	對	切	徒	報	代	也	
	切		切		汰	刀	也		
					漸	切			
					瀾	徒			
					也	蓋			
						勵			
						力			
						勉			
						也			
						切			
						憤			
						怒			
						也			
						切			
						洮			
						汰			
						對			
						彌			

妙法蓮華經文句卷第五下

寔十

隋天台智者大師說

門人灌頂記

從長者見是大火下是第二別譬也別更為  
四初長者見火譬譬上佛見五濁四行偈為  
本二捨机用車譬譬上釋迦為五濁寢大施  
小始坐道場十七行半偈為本三等賜諸子  
大車譬譬上釋迦示真實相我見佛子等志  
求佛道者六行偈為本四長者無虛妄譬譬  
上我為諸法王二行半偈為本就初見火其

文有四其意但三一明能見二明所見三明  
驚怖四廣前所見但成三意長者見標出能  
見譬上我以佛眼觀見也是大火從四面起  
者標出所見譬上所見六道眾生也即大驚  
怖譬上為是眾生故而起大悲心也而諸子  
等於火宅內下廣第二所見之火也還是釋  
成驚怖之義身受心法即宅之四邊從此四  
邊起淨樂等四倒八苦之火眾苦皆集若知  
身不淨苦無常即煩惱火滅舊有三解一云  
四大為四面六識並託其中二即四生三云

四倒依下文以生老病死爲四邊也即大驚怖者念其退大善故驚憂其將起重惡故怖驚即對慈念其無樂怖即對悲憂其有若我雖能於此所燒之門安隱得出者即是釋成驚怖慈悲之義雖是未盡之辭明佛以智慧力能尋正教見所詮諦不爲五濁八苦所危故名安四倒暴風所不能動故名隱蕭然累外故名得出而衆生不爾爲火所燒如來慈悲猶爲憂火所熾故言雖也經言所燒之門者今問教爲門者此教爲燒爲不燒教云教

門不燒佛教爲門能通所燒之人所通之人被燒名能通門名燒如門內人死名門爲衰門實不衰又問若爾教是常住非有爲法若不爾何故不燒今解不爾夫門有件有空非件無以標門非空無以通致件可灰燼空不可燒教有能詮所詮若非詮辯無以爲教若非所詮何以得出詮辯可是無常所詮非復無常得教下所詮故名安隱得出能詮磨滅故言所燒之門不從所燒之門何由安隱得出藉於言教契於所詮大經云因無常故而

果是常如此釋者如經於所燒之門也若小乘無常教門此從所燒門出若大乘常住教門文字即解脫者此教即理體達燒無燒而安隱得出若就如來權智即是從所燒門出若就實智體於所燒安隱得出故先作衣械几案出之不得後以無常出之即此意也樂著嬉戲著見名嬉著愛名戲又耽酒四見名嬉唐喪其功名戲著愛亦爾耽酒五塵名嬉空無所獲名戲空生徒死而無厭離如彼兒戲不覺不知者都不言有火名不覺不解

是熱法名不知既不知火熱不畏傷身名不驚不慮斷命故不怖衆生全不覺五陰八苦不知四倒三毒既不識感云何憂慮惑侵法身傷於慧命如是不覺於苦不知於集不驚傷道不怖失滅以不聞四諦教則無聞慧名不覺不得思慧名不知不得見解名不覺不得思惟解名不知見諦即驚悟思惟即厭怖又不覺現在苦不知未來苦故下文云現受衆苦後受地獄等苦即此義遍身者五識也心者意識心王也身為八苦所逼而心不厭

惱也亦云會種大乘功德是法身智慧為體  
體為四倒所逼而不知不覺心不歇患者不  
歇無常之苦不患煩惱之集也無求出意者  
不修道求滅也今謂火宅本譬五濁熾譬見  
濁戲譬煩惱濁不覺不知不驚不怖譬眾生  
濁火來逼身苦痛切已譬命濁心不歇患無  
求出意譬劫濁此與五濁相當云從是長者  
作是思惟下是第二捨凡用車譬譬上寢大  
施小上六行半明大擬不得後十一行用小  
擬得上不得有三一思大擬宜二無機三息

化今譬為二初用勸門擬宜二用誡門擬宜  
就勸誡各三一擬宜二不受三放捨勸門三  
者一從長者作是思惟身手有力下譬上念  
用大化於三七日中思惟如此事二從復更  
思惟下明子不受譬上無機眾生諸根鈍云  
何而可度三從或當墮落為火所燒下即是  
放捨善誘譬上無機息化我寧不說法疾入  
於涅槃也長者作是思惟下譬上三七日思  
惟也身手等者引下合譬云但以神力及智  
慧力以釋此譬身譬神通荷負手譬智慧提

拔依三昧斷德則有神通依智慧智德則有  
說法智斷之力能成法身此之智斷還從勸  
誠兩門入勸即為人悉檀誠即對治悉檀此  
二悉檀為第一義悉檀而作方便如來初欲  
勸門擬宜衆生令衆善奉行成就十力無畏  
一切種智而衆生不堪次欲以誠門擬宜令  
諸惡莫作證大涅槃衆生不堪無機息化故  
知念用大乘祇是勸誠兩悉檀神通智斷耳  
故上文云定慧力莊嚴以此度衆生即其義  
也前歎長者其年衰邁即譬智斷智斷即是

身手力也衣械几案者三藏法師云衣械是  
外國盛華之器貢上貴人用此貯之舊云衣  
襟譬大乘因几案譬大乘果初擬大乘因果  
是則無機也舊又云此物譬大乘戒定慧初  
七思惟所得法此如用衣械二七思惟衆生  
根綫如用几三七思惟樹地恩如用案云此  
義出阿含經今取合譬文若我但以神力及  
智慧力讚如來知見力無所畏者衆生不能  
以此得度伸力即是身慧力即是手如前說  
知見譬衣械無畏譬几十力譬案如來以神

通發動此三法以智慧宣說此三法無機息  
化衣械几案等略中廣之異耳略說名如來  
知見知即一切種智見即佛眼名略義玄譬  
如衣械一足而多舍處中說即名四無所畏  
用對四諦如几於法小廣於物小安隱或作  
廣說名為十力第十橫豎該括如案多足則無傾  
覆也於法則廣物則大安於三七日中思惟  
欲作如此廣略佛法而衆生不堪故言衣械  
几案也復更思惟下第二明子不受譬上無  
機唯有一門而復狹小門義如上說今更明

通別別者一謂一理一道清淨門謂正教通  
於所通小謂不容斷常七方便等教理寬博  
則非狹小衆生不能以此理教自通將談無  
機故言狹小耳通者理純無雜故言一即理  
能通故言門微妙難知故言狹小教者十方  
諦求更無餘乘唯一佛乘故言一此教能通  
故言門此教微妙凡夫不知出處是不知權  
不知入處是不知實二乘因聞少知出要永  
不知入菩薩雖自知出亦不知入奪七方便  
皆不知入上文云若我讚佛乘衆生沒在

苦不能以教自通將談無機故言狹小行者  
圓因自行行大直道無留難故故名為一善  
行菩薩道直至道場故名為門妙行難行方  
便無機故言狹小耳舊解人天小善故云幼  
稚無大乘善名未有所識今明二萬佛所教

無上道大乘善根微弱名幼稚若聞大乘能  
生謗毀名未有所識也戀著戲處者前明善  
弱此明惡強即是因時深著見愛果時深著  
依正欲界著六塵色界著禪味無色界著定  
上文云眾生諸根鈍著樂癡所盲不堪聞大

乘也或當墮落為火所燒指此二句名放捨  
善誘也墮落有二一者幼稚憶本戲處故墮  
落二都無識執物不堅故墮落譬著五欲墮  
在三途二者善弱無識誘毀大乘墮落三途  
也從為說怖畏下第二對治門三者一擬宜  
對治誠怖令出對治之相如大品中說四念  
是摩訶衍以不可得故異於小乘也既著戲  
處故說怖事今得免五濁火燒五陰舍宜應  
捨離若久住著必斷善根故云無令為火之  
所燒害從父雖憐愍下即是子不受誡也不

驚不畏者不生聞思如上說不識八苦五濁能燒善根如不知火不識陰界入法是諸苦器如不識舍不知喪失法身之由如不知何者為失從但東西走戲視父而已指此二句為放捨苦言也皆背明向闇如東西生死往還速疾如馳走於中起見愛如戲也雖用大擬不從大教故言視父而已從長者即作是念此舍已為大火所燒下即是第二用車譬譬上尋念過去佛所行方便力十一行偈上文有四今譬亦四一者擬宜三車譬譬上尋

念過去佛亦作三乘化也二者父知先心所好譬譬上作是思惟時十方佛皆現三者歎三車譬譬上正施三乘思惟是事已即趣波羅奈也四者適子所願譬譬上受行悟入是名轉法輪也大乘化功為父命眾生大善為子命大善若盡即子命斷子命斷則化功亦廢即父命斷前言苦痛切已猶是未死今云必為所焚即有死義也上文於所燒之門安隱得出今云若不時出必為所燒此義云何前得出者即是法身出今言若不時出即是

應身同疾衆生有善與應身時出衆生善斷  
不與應身時出即是俱爲所焚也今欲應身  
擬宜令其時出也從我今當設方便欲設權  
也從知子先心下第二明有得度之機也其  
昔曾習小是知先心性欲不同是知各有所  
好又知衆生昔曾習大習大未濃是爲大弱  
獸老病死故以小接是爲小強如身子六心  
中退本曾習大名知先心中獸老死名各有  
所好從而告之言下第三是歎三車希有譬  
譬上正轉法輪也此即爲三謂勸示證玩好

希有下即是勸轉如此種種下即是示轉汝  
等於此火宅宜速出來皆當與汝即是證轉  
也從爾時諸子聞父所說下第四適子所願  
譬譬上受行悟入前偈本略今譬事廣廣明  
修因至果依六句解釋一適願者機教相稱  
此即聞慧也勇銳者即是思慧思心動慮思  
慧方便也互相推排者推四真理排伏見惑  
邪正未決名爲互相此入修慧屬煖頂位也  
競者競取勝理也此是忍法位競取勝理初  
觀三十二諦競趣真道後縮觀趣苦法忍也

共者是世第一法位同觀一諦與苦法忍四  
觀不別也馳走者入見道十五心速疾見理  
譬上便有涅槃音見道之中分得涅槃也爭  
出者思惟道也爭出三界成無學果斷思惟  
盡方出火宅即譬上偈及以阿羅漢法僧差  
別名也觀心解者中道正觀直觀實相心法  
相稱名適所願境無邊故觀亦無邊名勇境  
研心利名銳心境相研名互相推排心王心  
數緣境速疾名競共馳走徧歷一切陰界入  
等無非實相名為出火宅也云是時長者見

諸子等下是別譬中第三等賜諸子大車譬  
譬上顯真實相此文為四一父見子免難歡  
喜譬譬上我即作是念所以出於世至今我  
喜無畏兩行一句偈為本二諸子索車譬譬  
上大車機發我見佛子等志求佛道者咸以  
恭敬心皆來至我所兩行偈為本三等賜諸  
子大車譬譬上於諸菩薩中正直捨方便但  
說無上道三句為本四諸子得車歡喜譬譬  
上菩薩聞是法疑網皆已除一偈為本上法  
說中光明機發次說障除佛喜無畏今譬中

先明免難後明索車若具足論應作四句有先障除後機發如四大聲聞等於三藏中障除小品末法華初大機始發二障未除大乘機發如華嚴中及法華中諸凡夫衆得入佛慧者餘兩句如上說若大機先動後障除如方便品所說若先除障後機動如今所說機動障除互現共成一意也又方便品明佛喜無畏此中諸子歡喜以子喜故其父亦喜此亦互現共成一意也就免難中具二義謂免難歡喜若子未免難父則憂念若得離火心

即泰然故免難歡喜得為一譬以子歡喜其父亦喜得譬佛喜也四衢道中者舊云四濁障除如四達路更得一濁除如露地坐今不爾五濁直明垢障之法未論治道不應譬衢道衢道正譬四諦四諦觀異名為四衢四諦同會見諦如交路頭見惑雖除思惟猶在不名露地三界思盡名露地住果不進故云而坐不為見思所局故云泰然生滅度安隱想故言歡喜也各白父言下第二是索車譬文云願賜我等三種寶車文無索字義者依此

請辭明索車耳有人云二乘索卓菩薩不索  
作十難難之一云二乘出三界外至許車處  
索果車菩薩未至許處那忽索車二云大乘  
經無菩薩索小乘果故知不索三云所化菩  
薩從初發心終至補處皆是凡夫不出三界

義則無索能化菩薩三十三心見傾思未盡  
三十四心便是佛佛從誰索四二乘果在正  
使門外佛果在習氣無知門外二乘斷正使  
盡不見車是故索菩薩未斷習與無知那忽  
索五明二是方便可言索文云唯此一事實

餘二則非真以此推之但二索一不索六從  
大品已來至法華已前佛因佛果皆是方便  
者付窮子財此之珍寶皆應是方便若付財  
是真實則大品等明佛乘已是真實那忽更  
索七方便品偈叙昔說小是方便不叙大是  
方便當知佛子大乘非方便那忽有索八若  
三人索者何無領解領解無故故知不索也  
九合賜車文云見諸衆生出三界苦得涅槃  
樂故賜以大乘菩薩不證涅槃那忽索十諸  
子安坐故就父索二乘果滿不修行故安坐

可得有索菩薩行未息無安坐義那忽索私以總別駁之索是求請之別名在意名求索在口名請索在身名乞索如矇者求知如飢者請食如迷者問道凡居不達之地何有不索之理由索故許與許與故歡喜今之具有請與歡喜法說中千二百人身子為首殷勤三請菩薩衆中彌勒為首佛口所生子大數有八萬合掌以敬心欲聞具足道譬說之初身子為中根人請又總為四衆請傍為下根請文云善哉世尊願為四衆說其因緣法說

許云汝已殷勤三請豈得不說譬說許云當以譬喻更明此義因緣許云我及汝等宿世因緣吾今當說法說竟身子歡喜譬說竟迦葉等歡喜宿世說竟樓那歡喜又合譬文云今諸子等日夜劫數常得遊戲與諸菩薩乘是寶乘直至道場以喜故知與與故知請三周三義明文炳然何故偏言二索一不索別駁其一齊三藏明菩薩不斷感依法華有四句謂障除大機動障未除大機動機動則知索其二云大乘經無菩薩索小乘果大品云

三乘之人同以無言說道斷煩惱入涅槃斷煩惱入涅槃同何故不索其三云三十三心名菩薩三十四斷思盡即成佛從誰索此猶三藏義見障未除大機尚動況三十三心而當不動動即知索其四菩薩未斷習氣無知不應索斷盡成佛從誰索此三乘通教義具縛障存尚大機動況殘習無知耶其五唯此一事實實即是真那忽復索被會絕待之唯一一外更無法昔待二之唯一一外更有法一名同而體異闇執瓦礫魚目謂夜光

月形愚蚩而智慧云云其六般若已來法華已上與付財法同不應有索汝不聞共不共般若若不共不須索共者不應不索云云其七方便品初昔說小是方便不叙昔說大是方便大非方便是故不索者汝不聞壽量品中我少出家得三菩提乃至中間若小若大若已若他皆我方便諸佛亦然寧得不索其八若菩薩索菩薩應領解領解既無故知不索汝不聞法說竟天龍四衆皆領解其非菩薩謂是何耶又法師品中三乘皆與記若不領解那

忽與記其九出三界苦得安隱樂乃賜乃索  
菩薩未出未證是故不索猶是三藏義耳其  
十諸子安坐爾乃賜車二乘行息名安坐菩  
薩行不息非安坐那忽索車猶是前義耳自  
有行息索行未息索又菩薩行行即是乘乘  
乘由索得何謂不索觀其詭累三藏故設此  
十難管見一斑都非大體今當為爾分別說  
之自有不斷感不索車三藏菩薩是自有斷  
感索車通教菩薩是自有亦斷感亦不斷感  
亦索亦不索別教菩薩是自有非斷感非不

斷感非索非不索圓教菩薩是又歷五味乳  
味兩意一亦斷亦不斷亦索亦不索二非斷  
非不斷非索非不索酪味一意不斷不索生  
酥備四意熟酥但三意醍醐一意宏綱大統  
其義如此於一一句一一意復各四句謂障  
除機動障未除機動障亦除亦未除機動障  
非除非不除機動斯宗不見執一非三深可  
悲愍世人執車數不同說車體不同或言初  
說三車後會三歸一或言初說有三後會三  
歸一或言初說有四後會三歸一所以出經

勿信人語此文引昔佛為聲聞說應四諦法  
為緣覺人說應十二因緣法為菩薩人說應  
六波羅蜜法今佛說三數亦如此華嚴第八  
云下劣歇沒者為示聲聞道根鈍樂因緣為  
說緣覺道根利有慈悲為說菩薩道無上樂  
大事說無量佛法三十六又云三解脫法出  
聲聞乘無諍法出緣覺乘六度四攝出大乘  
知一切法出佛乘又第九地說聲聞乘相支  
佛乘相菩薩乘相如來乘相地論釋第二地  
觀十不善集墮三塗十善集生天上十善與

四諦觀智合成聲聞又上十善與不從他聞  
觀智合成緣覺又上十善與具足清淨觀智  
合成菩薩地又上上十善與一切種一切佛  
法成佛瓔珞第十三云十方佛說三乘一  
乘中又開三合九乘九乘悉會入平等大慧  
聖說如此不能融通互相是非非法毀人過  
莫大焉今約教分別之若說三乘法門異而  
真諦同者三藏教也若說三乘法門同真諦  
皆同者通教也若說三乘三三九乘若說四  
乘淺深階級各各不同而向入平等大慧者

別教也若說三乘九乘四乘一一皆與平等  
大慈相應無二無異者圓教也又歷五味分  
別乳味但明菩薩乘佛乘酪味但明異三乘  
生酥味備明三乘四乘九乘各各分齊不相  
濫熟酥味唯除異三乘餘如生酥也醍醐中

純說佛乘無復餘乘也若識此意異說無妨  
若不知者祇增諍論耳世人明佛乘乘體有  
異光宅取佛果究竟盡無生二智為車體遠  
出五百由旬之外對昔為高具含萬德對昔  
為廣莊嚴取因總萬行為體上求為高下化

為廣舊不取功德功德與凡夫共唯取智慧  
為體舊又取福慧共為體文云乘是三車以  
無漏根力覺道禪定解脫三昧而自娛樂豈  
但智慧耶又一師但取有解為體空解無動  
故不取盡無生智即有解也又一小乘取空  
慧為車體文云我等長夜修習空法云大乘  
亦以實慧方便為車體車體譬有有有運動  
故也私謂諸師釋佛乘之體而競指具度何  
異衆盲觸象諍其尾牙依天台智者明諸法  
實相正是車體一切衆寶莊校皆莊嚴具耳

至賜車文中當點出舊解小車者小果也果  
有有為無為功德正取有為以譬車運運入  
無餘也有為果中具有福慧以慧為正福屬  
具度其慧有十而八智通因果盡無生智唯  
是果位乃取二智以譬車果以是義故車在  
門外若依小品云是乘從三界出到薩婆若  
中住若未出時已乘是乘爭出火宅何故復  
言車在門外若先在外乘何而出然但乘通  
因果三十七品斷見思惑皆是因乘盡無生  
智皆名果乘要因因乘斷除惑盡方得果乘

盡無生智故言車在門外但果正因傍就果  
為言車在門外若內因斷結運義名乘外果  
不運何得名乘然果無斷惑之運要以盡無  
生智入無餘涅槃方是好運也若乘因到果  
何意方更索車舊云機索情索十五機索者可解  
情索者佛說盡無生教羅漢證此果已用神  
通天眼試觀未來猶見變易生死浩然自疑  
所得盡無生證若實無生云何見有如其浩  
然昔非究竟情中從佛索先所許是為情索  
若尋經文文無此語若推索義義不應然文

無可解推者下文云自於所得生滅度想既以天眼見有生死何故復起滅度之想此則自相矛盾又佛滅後羅漢不值餘佛不能決了既自以天眼照見生死何須見佛而決了耶又初禪天眼尚不見二禪況見變易亦與攝大乘乖也又羅漢得無漏業用天眼見變易未來生死果報者即時人修五戒十善應自見其未來果報當知界外果報豈是天眼所見耶不用此判情索也今言情索者昔日依教謂盡無生能入無餘而於方等中見善

薩不思議聞淨名彈弁若我所得是實大士不應折挫若我非實佛不應說真故云茫然不知所云至大品中領知大法聞此樂大心起方欲進修大乘而不能知得與不得此等皆是情中已索大乘之義故身子領解提昔疑情見諸菩薩授記作佛不豫斯事嗚呼自責欲以問世尊為失為不失即是指昔方等已有情索也今加口索者因聞方便品初偈略聞佛說並是方便即復執今方便疑昔未極故云我今不知是義所趣動宿疑情故發

言三請索求昔日所說之實機在大乘情求  
 昔實又情求大乘口問昔實六度通教例爾  
 從舍利弗爾時下三等賜大車有兩章兩廣  
 兩釋一等子二等車以子等故則心等譬一  
 切眾生等有佛性佛性同故等是子也第二  
 車等者以法第十六等故無非佛法譬一切法皆摩  
 訶行摩訶衍同故等是大車而言各賜者各  
 隨本習四諦六度無量諸法各於舊習開示  
 真實舊習不同故言各皆摩訶衍故言大車  
 其車高下廣車為二一廣叙車體次釋有車

之由叙車體中先叙高廣次明白牛後明儼  
 從假名車有高廣相譬如來知見深遠橫周  
 法界之邊際豎徹三諦之源底故言高廣也  
 眾寶莊校者譬萬行修飾也周匝欄楯者譬  
 總持持萬善遮眾惡四面懸鈴者譬四辯下  
 化也張設憶蓋者譬四無量眾德之中慈悲  
 最高普覆一切也珍琦雜寶而嚴飾之者真  
 實萬善嚴此慈悲大經云慈若具足十力無  
 畏名如來慈慈中行布施等云寶繩交絡者  
 譬四弘誓堅固大慈心也垂諸華纓者譬四

攝神通等悅動衆生也亦譬七覺妙髮也重  
敷統絰者譬觀練熏修一切諸禪重沓柔輓  
也安置丹枕者車若駕運隨所到處須此支  
昂譬即動而靜即靜而動若車內枕者休息  
身首譬一行三昧息一切智一切行也丹即  
赤光善無分別法也駕以白牛者譬無漏般  
若能導諦緣度一切萬行到薩婆若白是色  
本即與本淨無漏相應體具萬德如膚充煩  
惱不染如色潔又四念處爲白牛四正勤中  
二世善滿如膚充二世惡盡如色潔四如意

第十

十七

足稱行者心如形體姝好筋譬五根住立能  
主義也力譬五力摧伏幹用義也行步平正  
以譬定慧均等又譬七覺調平其疾如風者  
八正道中行速疾到薩婆若僕從者譬方便  
波羅蜜能屈曲隨人給侍使令衆魔外道二  
乘小行皆隨方便智用故淨名云皆吾侍也  
又果地神通運役隨意即僕從也次所以者  
何下釋有車之由者由財富藏溢譬果地福  
慧圓滿名財富無量庫藏充溢行藏理藏一  
切法趣檀尸忍等是趣不過者是約行爲如

來藏一切法趣陰入界根塵等是趣不過即  
是約理明如來藏自行此行理名充化他名  
盜實智滿名充權智用名溢入中道名充雙  
照故名溢非但藏多又皆充溢何法不是摩  
訶衍故大乘無量也而作是念下即是廣明

心等文爲二一廣心等二釋廣心等者財富  
無量是子無偏是故心等若富而非子是子  
而貧則不得等今七寶大車其數無量若教  
若行皆摩訶衍即財多也各各與之不宜差  
別者不移本習而示真實如身子於智慧開

佛知見具一切佛法目連於禪定開佛知見  
具一切佛法餘人例爾又方等般若若念處三  
勤根力覺道種種異名皆開示實相歷一切  
法亦復如是故言無量也所以者何以我下  
是釋兩等初釋財多尚同一國況復諸子譬  
大圓因徧該善惡況佛知見耶次釋子等者  
非子尚充況是子耶譬佛無綉者尚度況有  
緣子耶尋文可解從是時諸子各乘大車下  
第四適願歡喜譬上受行悟入本求羊鹿水  
牛期出分段今得白牛盡於變易過本所望

豈不歡喜從於意云何下第四不虛譬譬法  
王不妄一問二答三述歎問如文舍利弗言  
下第二答爲二一免難不虛亦名以重奪輕  
不虛二不乖本心不虛亦云過本望不虛各  
爲三謂標章解釋況結標免難如文何以故  
下第二釋者命重身輕全身免火已得大寶  
濟于重命豈應有虛結免八苦之火全五分  
之身已是大寶況二萬佛所大乘慧命圓因  
成就佛知見開寧是虛妄次世尊若是下第  
二不乖本心初標不乖本心章本知無三意

今不謗不謗者已不乖本心釋云本知無小  
意今不毀墮惡旣無毀因不墮惡果不與小  
車不乖本意結云自知財富無量欲饒益其  
子與一大車過本所望是故不虛結前章云  
方便救濟似譬斷德神通之力結後章云財  
富無量似譬智德辯說之力前是子等故不  
虛後是財等故不虛佛告舍利下第三歎述  
有二善哉者述其二不虛也問佛何不自說  
不虛答佛許三與一自說爲難身子說不虛  
取信爲易舍利弗如來亦復下第二合譬光

宅開十譬但合七不合三七中正合五兼第五第八不合第七第九故知十譬繁而不會今合總別二譬總中有六今文皆合小不次第今初第一合上第一上長者名行位號德業合云如來亦復如是先合位號如來無量德號略舉十義如上說一切世間將處所以定名行上云國邑聚落合直云一切世間通指同居有餘自體皆是妙色妙心果報之處如來徧應三處即一切世間合上國邑聚落也於諸怖畏下合上歎內外德內是年高衰

邁識達則多譬如來智斷於諸怖畏無明未盡合上衰邁顯斷德也成就無量知見合其年高顯智德也力無畏等合上外德財富無量也神力者深修禪定能得神通合上田也智慧力智必照境如身之託處合上宅也身足方便波羅蜜合上諸僕從也從大慈大悲下第二合上第四慈悲是施化之本一切是五道恒爲慈悲所被合上五百人也而生三界火宅下第三合上第二其家也爲度衆生下第四合上第六衆生有緣親者前度合上

三十子也生老病死等下第五合上第五款  
然火起譬也教化令得三菩提下第六合上  
第三教能詮理尋理起行即得菩提故知教  
理共用合上唯有一門譬也若講說令前後  
可解一一須提方便品譬本來勘揀之後去  
例爾從見諸衆生下第二合別譬別譬有四  
今合第一見火譬譬有三意其文有四合亦  
四但譬中驚怖在前諸子戀著戲處在後合  
中不覺不驚在前拔苦與樂在後互現辯其  
不定耳今以一見字第一合上第一能見之

眼即是如來寂照智眼能見也諸衆生爲生  
老下第二合上第二所見之火從四面起此  
中明八苦爲火四苦如文貪著追求求不得  
苦後受地獄天上人間是五陰苦愛離怨會  
如文此之八苦從四倒四面起也從衆生沒  
在其中下第三合上第四所見火譬諸子不  
覺不知等也不觀苦集故不厭不觀道滅故  
不求解脫雖遭大苦不以爲患合上心不厭  
患無求出意也從佛見此已便作是念下第  
四合上第三起驚怖我雖能於此所燒之門

安隱得出意也應拔其苦難者即大悲之力  
與無量樂者即大慈之力也從如來復作是  
念下合第二捨凡用車譬上譬有勸誡今但  
合勸不合誡法說中亦勸善不明誡惡故勸  
修為正誠惡是傍亦是勸善即誡惡誡惡即  
勸善今合勸善即知合誡惡也上勸文有三  
謂擬宜無機息化擬宜有身手衣械等但以  
神力者合上身力及智慧力者合上手力也  
讚如來知見合衣械也力無所畏合几案也  
若佛初出即用此擬衆生不能以此得度也

所以者何下釋不得度合上第二子不受勸  
譬正由五濁障重未免生死等火大乘微妙  
不能得入故言何由能解佛之智慧此一句  
即合上唯有一門而復狹小小故不能解智  
不解智慧者即是行為門意也如彼長者雖  
復身手有力而不用之合上第三放捨善誘  
無機息化或當墮落為火所燒也此文無放  
捨語譬及譬本息化意甚分明也息化文為  
二先牒前後三譬次正合息化牒前一譬正  
帖合息化牒後兩譬傍成息化也雖復身手

有力而不用之此牒前身手救子不得譬以  
合息化如來亦寢大化也但以殷勤下牒施  
三之譬也就然後各與下牒第三等賜大車  
譬也如來亦復如是下十六字正合第三息  
化也從但以智慧方便下合用車救得譬上

文有四此中亦四但以智慧下合第一擬宜  
三車也為說三乘下合上第二知子先心也  
而作是言下合上第三歎三車希有上有勸  
示證今亦具合但不次第第一合上第二汝  
等莫得樂住三界下是示其盡無生處也三

界是示苦諦勿貪麤弊乃至生愛等示其集  
諦速出三界示其滅道滅道即是示其三界  
外有智斷三乘之果故今速出三界當得三  
乘三乘正取道滅為體也我今為汝保任此  
事終不虛者是第二合上第三必與證得不  
虛也復作是言汝等當知下第三合上第一  
歎希有如此三乘是諸佛方便引物儀式故  
眾聖所稱得無生智為自在得盡智為無繫  
我生已盡不受後有名無所依所作已辦梵  
行已立名無所求也從若有眾生內有智性

下合第四適子所願譬上有真似等四位今  
合亦四但上總今別三乘各為四皆引上譬  
來帖合也內有智性者宿習三乘樂欲成三  
乘智性故佛施三乘之教也內有智乃至從  
佛聞法信受合上聞父所說玩好之物適其  
願故合上聞慧也殷勤合上心各勇銳思慧  
也精進合上第二推排推是推理排是排惡  
惡去故精理明故進合上修慧也欲速出下  
合上第三競共馳走也是名聲聞乘合上第  
四爭出火宅三乘修行皆有此四而辟支佛

求自然慧者辟支是法行人從他聞法少自  
推義多故取譬鹿鹿不依人自然者從十二  
緣門入此門本自有之非佛天人所作名自  
然慧不從他聞復名自然慧也菩薩稱一切  
智者不同二乘乃是佛智菩薩望此修因即  
是大乘兼運之意也如彼長者見諸子等安  
隱得出下合第三等賜大車譬上文有四一  
免難二索車三等賜四歡喜今略不合第二  
第四也但合免難義兼索車合等賜義兼歡  
喜今雙牒免難賜車二譬然後雙合二譬如

彼長者下牒免難自惟財富下牒等賜如來亦復如是下合免難門有三義入義出義別義若三界爲宅五陰爲舍由迷色心而入色心即是入宅生死之門若作出者是乘從三界出即是稟佛通教下所詮爲門若別義者即是稟別教下所詮爲門也今言佛教門者正是藏通二教教下之理共爲門得出三界而免難也如來爾時便作是念下合等賜也上等賜先列二章門二廣說三釋出今合關略文小不次第如來爾時便作是念我有無

量智慧力下第一合上第四釋有車之由上云財富無量庫藏充溢也是諸衆生皆是我子下第二合上第五廣等心上云我財物無極不應以下劣小車也不令有人獨得滅度皆以如來滅度而滅度之豈非合等心義是諸衆生脫三界下第三合上第一等心章門上云各賜諸子等也諸佛禪定解脫等下第四合上第二標車章門皆是一相一種下第五合上第三正廣大車通合上高廣乃至僕從等一相是實相即法身一種是種智般若

能生淨妙之樂樂即無苦名為解脫三德高  
廣具足莊嚴收羅衆德名摩訶衍合上大車  
譬也如彼長者以三車下合第四不虛譬上  
答有二一全身命二不乖本心各有三別今  
但合不乖本心兼得全身何者佛意本為除  
其五濁五濁先十既盡大善自全上不乖心有三  
一標次釋三況今但合釋合況也初牒三車  
誘引後與大車譬次合如來初說三乘誘導  
然後但以大乘此合解釋不乖本心上云先  
作是意我以方便今子得出也何以故下合

上第三況出不虛即是長者自知財富無量  
欲饒益諸子故許三與一非是虛也此釋小  
異於前前意為今諸子得出意不在三既出  
不與亦非虛妄今明如來出世本欲說大但  
為小智樂著三界故以方便誘引既已得出  
還與大乘即稱本心故言能與衆生大乘之  
法但不盡能受也若華嚴中能受即為與大  
不俟開一為三不能受者以方便力於一佛  
乘分別說三三由衆生非佛本意故用此釋  
成不乖本心不虛也

妙法蓮華經文句卷第五下

第十

五

音釋

燼徐乃切 械古得切 聒恥都舍切  
火餘也 前械也 也  
 滿比角切 蒙莫紅切 無無見也 有童 礫郎狄切  
也 駁也 子而 也 也 也  
 也老之切 楯食尹切 統統於統切 統統於統切 統統於統切  
也 也 也 也 也 也  
 揀所華切 誘以九切

永樂北藏

妙法蓮華經文句

第一五九册

永樂北藏

妙法蓮華經文句

第一五九册